

Ipak, Odbor guvernera Javnog radio-televizijskog sistema (PBS) nije usvojio statute PBS-a zbog neslaganja vezanih za vlasništvo nad opremom i raspodjelu prihoda kompanije. Budući da statuti PBS-a nisu usvojeni, kompanija se ne može registrovati, čime se odlaže reforma sektora javnog emitovanja. Entitetski zakoni o uslugama javnog emitovanja nisu u skladu sa državnim zakonom.

Sveukupno gledano, pripreme koje Bosna i Hercegovina vrši na planu informacionog društva i medija sporo napreduju. Provedba zakonodavnog okvira vezanog za javno emitovanje neophodna je zbog reformi u ovom sektoru, što je prioritet Evropskog partnerstva. Ključni prioritet i dalje je osiguranje funkcionalne nezavisnosti RAK-a. Prijetnje nezavisnosti RAK-a koje su nastavljene negativno utiču na stvaranje konkurencije.

4.2.7. Finansijska kontrola

Bosna i Hercegovina je ostvarila određeni napredak u oblasti finansijske kontrole.

Preduzeti su dalji koraci na uvođenju **javne interne finansijske kontrole (PIFC)**. Na državnom i entitetskom nivou nastavljeno je sa provedbom zakona o internoj reviziji, a administrativni kapaciteti se polako pojačavaju kako bi se osiguralo pravilno upravljanje javnim fondovima. Ipak, broj stručnih internih revizora i dalje je vrlo nizak.

Vijeće ministara BiH i vlade Republike Srpske i Federacije usvojili su svoje strateške dokumente o PIFC-u. U Federaciji i Republici Srpskoj uspostavljaju se jedinice za internu reviziju. Centralne harmonizacijske jedinice (CHU) postoje u Ministarstvu finansija i trezora BiH i u Ministarstvu finansija Republike Srpske. Međutim, Federacija još nije angažovala upravljačke kadrove za svoju Centralnu harmonizacijsku jedinicu. Nedostatak osoblja predstavlja prepreku daljem razvoju PIFC-a. Potrebno je uspostaviti odgovarajuće sisteme za finansijsko upravljanje i kontrolu. Potrebno je uspostaviti odbor za koordinaciju kako bi se osigurao usklađen pristup PIFC-u u sve tri centralne jedinice za usklađivanje.

Kada se radi o **vanjskoj reviziji**, četiri institucije glavnog revizora (državna, entitetske i Brčko Distrikt) dobro rade, ali nemaju uticaja na upravljanje javnim finansijama. Institucije glavnog revizora u entitetima nisu predmet zakona o državnoj službi i upravi. Državna Institucija glavnog revizora nije u potpunosti nezavisna od Vijeća ministara. Uredi za reviziju na državnom i entitetskom nivou rade na izgradnji kapaciteta za vršenje revizije. Nastavljena je saradnja između institucija glavnih revizora kroz Koordinacijski odbor institucija za reviziju. Koordinacijski odbor je objavio smjernice za vršenje revizije i strategiju razvoja ljudskih potencijala. Uspostava parlamentarnih odbora za reviziju unaprijedila je kapacitete sva tri parlamenta za postupanje prema izvještajima o reviziji. Kao rezultat toga, na osnovu izvještaja o reviziji, Odbor za reviziju Parlamentarne skupštine Bosne i Hercegovine predložio je izmjene budžeta.

Sveukupno gledano, u oblasti finansijske kontrole Bosna i Hercegovina je djelimično

ispunila svoje ciljeve u pogledu zakona, propisa i reorganizacije vezane za PIFC. Interna revizija se uvodi. Potrebno je dodatno razviti sisteme za finansijsko upravljanje i kontrolu. Potrebno je riješiti pitanje nezavisnosti vanjskih revizora.

4.2.8. Statistika

Ograničeni napredak ostvaren je na području statistike.

Mali napredak ostvaren je u pogledu **statističke infrastrukture**. Povećan je broj osoblja u Agenciji za statistiku Bosne i Hercegovine (BHAS). Ipak, potrebno je značajno unaprijediti saradnju između BHAS-a i entitetskih zavoda za statistiku. Postojeće zakonodavstvo i dalje se tumači na različite načine. Državni Zakon o statistici i Sporazum o saradnji i koordinaciji u oblasti statistike se ne provode pravilno.

Saradnja između BHAS-a i Uprave za indirektno oporezivanje je slaba. Uprava za indirektno oporezivanje BHAS-u ne pruža dovoljno administrativnih podataka. Ovo za rezultat ima da su statistički podaci o poslovanju, makroekonomski statistički podaci i statistički podaci o vanjskoj trgovini lošeg kvaliteta (*vidi poglavlje 4.1.4 – Carine i porezi*).

Određeni napredak je postignut na području **klasifikacije i registara**. Statistički poslovni registar je operativan, ali manjak podataka iz određenih administrativnih izvora negativno utiče na njegov kvalitet. Umjereno je napredovalo približavanje Statističkoj klasifikaciji privrednih djelatnosti NACE Rev.2.

Određeni napredak postignut je u oblasti **sektorske statistike**. Tehničke pripreme za popis stanovništva i domaćinstava su napredovale. Entiteti se nalaze u različitim fazama pripreme mapa za popisne jedinice. Ipak, nije usvojen državni zakon o popisu stanovništva i domaćinstava. Nije postignut politički dogovor o korištenju rezultata popisa kod određivanja sastava javnih organa. U nedostatku zakona o popisu, nije izvršen ni probni popis.

Na polju socijalne statistike u 2010. godini je provedena proširena Anketa o radnoj snazi (LFS) i objavljeni su rezultati.

Ograničeni napredak je postignut u pogledu makroekonomskih statističkih podataka. Objavljena je godišnja procjena BDP-a za 2009. Ipak, Zavod za statistiku Republike Srpske ne primjenjuje u potpunosti višegodišnji master plana za izradu nacionalnih računa. Prema tome, nije moguće izraditi kvartalne nacionalne račune.

Kvalitet kratkoročne statistike, statistike o građevinskoj industriji i strukturne poslovne statistike je poboljšana. Vršene su kvartalne ankete o ulaznim cijenama u poljoprivredu. Započele su pripreme za poljoprivredni popis (*vidi poglavlje 4.2.2 – Poljoprivreda i ribarstvo*). Provedena je probna anketa o strukturi farmi. Postignut je napredak u oblasti energetske statistike.